

Ka Moolelo no Umi: Kekahi Alii Kaulana o ko
Hawaii Nei Paeaina.

MOKUNA I.

NA KUPUNA O UMI.

U A OLELO ia ma keia moolelo, he keiki kapa alii o Umi, ma ka aoao o kona makuahine, o Akahiakuleana, a ma ka aoao o Liloa kona makuakane, he 'lii nui mai ke kumu mai, a ma ia aoao, he 'lii nui o Umi. Aka, ma ka hoomaloo ana i ka pololei o ka aoao o ka makuahine, loa no he 'lii nui o Akahiakuleana, mai loko mai no o ka mookuauhau alii o Hawaii.]

O Umi ka mea nona keia moolelo, aka, i mea e maopopo ai ka oiaio, nolaila, e hoomaka ka olélo mua no kona kaikuaana no Hakau. O Liloa ka makuakane, o Piena ka makuahine, he mau alii laua elua, he 'lii ke kane, he 'lii ka wahine. Na laua mai o Hakau. Ua olelo ia o Hakau he 'lii nui no Hawaii, no ka mea, ua like ke 'lii nui o kona mau makua. O Waipio i Hawaii, kahi noho mau o Liloa me kana wahine, me Piena, a malaila i loa ai o Hakau. He 'lii nui aimoku o Liloa no Hawaii a puni.

A hanau o Hakau, ke keiki mua a Liloa me kana wahine hoao me Piena, hele aku la o Liloa mai Waipio aku a hiki i Koholalele, ma ka hikina o Hamakua, e pili ana me Hilo. O ke kumu o keia hele ana o Liloa, he kapu heiau nana i laila, o Manini ka inoa o ua heiau la. A pau ke kapu heiau ana, hele aku la ia a noho ma Kaawiki-wiki; o kona kumu i noho ai i laila, o ka lealea i ka pahee, a me na hana lealea a pau loa. Ia ia e noho ana ma laila, hele aku la ia i ka auau wai, ma ke kahawai o ka Hoeha, e pili la me Kealakaha. Ia ia i hiki ai ma laila, ike aku la ia i ka wahine maikai o Akahiakuleana, e hoi mai ana mai lalo mai o ka wai auau, aohe kapa, a e noho ana kana kauwa wahine ma kapa, me kona pau.

A ike o Liloa ia ia, ua hoala ia mai kona manao e hana aku ia Akahiakuleana, alaila, moe iho la laua. Ma keia moe ana, ua loa o Umi, ka mea nona keia moolelo. Mamua ae o ka launa kino ana o Liloa ma, ua kahe o Akahiakuleana, a ia laua i moe ai, oia kona mau ana, nolaila, ua loa koke ke keiki.

KE KUAUHAU NO AKAHIAKULEANA, KA MAKUAHINE O UMI.

Maanei e maopopo ai ka pili ana o Akahiakuleana, ma ka mookuauhau o Liloa, a pela i maopopo ai he 'lii nui no o Umi. E pono e nana malalo iho i na kumu i loaai na pili. O Kanipahu ke kumu o Liloa a me Akahiakuleana i pili ai.

KANE.	WAHINE.	KEIKI.
Kanipahu.	{ Alaikauakoko.	Kalapana.
Kalahuimoku.	Hulani.	Kalahuimoku.
Oikialamea.	Laamea.	Oikialamea.
Kamanawakalamea.	Kalamea.	Kamanawakalamea.
Ouakaiua.	Kaiua.	Ouakaiua.
Kanahae.	Kuaimakani.	{ Kanahae.
Kuaimakani. }	Kapiko.	Kuaimakani.
Kuleanakupiko.	Keanianihoolilei.	Kuleanakupiko.
Liloa.	Akahiakuleana.	Akahiakuleana.
		Umi.

A pau ka moe ana a Liloa me Akahiakuleana, he mau la i hala mahope, ike aku la o Liloa i ke ano hapai o kana wahine, ninau aku la keia i ua wahine la: "Na wai oe?" I mai la o Akahiakuleana: "Na Kuleanakupiko." I aku o Liloa: "He kaikuahine no ka oe no'u." I mai la kela: "Pela paha."

A pau keia mau kamailio a laua, kauoha aku la o Liloa ia Akahiakuleana: "I noho oe, a i hanau he keiki kane, e kapa iho oe i kona inoa o Umi. A i hanau he kaikamahine, kapa iho oe ma kou aoao." I mai la o Akahiakuleana ia Liloa: "Heaha kau hoailona e haawi mai ai, i maopopo na ke 'lii keia keiki?" A lohe o Liloa, haawi mai la ia i kona malo a me kona niho palaoa, a me ka laau palau. I mai la o Liloa ia Akahiakuleana: "Eia na hoailona o ka kua keiki; a hiki i kona wa nui, e haawi aku oe i keia mau mea nona." Ae aku la o Akahiakuleana, lalau aku la ia, a haawi aku la i kana kauwa wahine, nana e malama ia mau mea. Alaila, hele aku la o Liloa a hipuupuu i ka laui i malo nona. A hume iho la o Liloa i ka malo laui, a hoi aku la i kona hale noho. A hiki o Liloa i ka hale, olelo mai la kona poe kanaka ia ia: "He malo maoli hoi kou e Liloa i hele aku nei, eia ka he malo laui kou i keia wa."

Malaila o Liloa i noho iho ai a pau ka hoomahanahana ana o kona heiau, hoi mai la oia i Waipio, i kona wahi noho mau.

MOKUNA II.

KA HANAU ANA O UMI.

NOHO iho la o Akahiakuleana me ka hapai ia Umi. Ma keia hapai ana, manao no ke kane i ka ili, nana no keia keiki e hapai nei. Nolaila malama iho la i kana wahine, aole oia i ike na Liloa.

A hiki i ka wa i hanau ai o Akahiakuleana, i ke keiki, kapa iho la ia i kona inoa o Umi; hanai iho la kona makuahine ia ia a nui. Ia wa hoomaka o Umi e kalohe, a e lealea me na keiki e ae. He mea mau ia Umi ka hele e paani me kamalii, a pau ka